

獨漈詩箋

順德陳恭尹元孝原著

同里族末陳荆鴻箋釋

夜雨有懷東張桐君兼寄董无休

醉來不覺和衣卧小樓未滅看書火夢回四壁走風濤空牀聽
雨三更坐忽憶少時吟興狂君與董侯同過我席門蓬徑話終
朝寶馬高車停道左董侯欲去君且留予時更鼓滿湘舵落落
風塵老漸來蕭蕭白髮生無那君才自足奮桑榆致身不肯游
青瑣屈伸潛躍各有時南北東西何不可董侯屢寄山陰書君
來日剡離支果從前屈指幾烟雲吾輩幸存非坎坷君不見五

羊城下陰雨中劉苑荒蕪趙臺墮

董瑒字元休見中游集

張梯字桐君山陰人張杉南士弟也

按中游集中有宿董元休五羊寓舍留別一首白云扁舟此去復為客時先生二十八歲正二次北行將發前也此云忽憶少時吟興狂又云予時更鼓滿湘舵蓋憶指戎戍事言

嘉魚

嘉魚潛石穴終歲氣常寒本欲承珠露寧知上玉盤有無通雅
訕咫尺隔風湍未必名為累隆冬澤易乾

嘉魚吾舊識高價市人爭似鯽身微削如鯪鬣乍生細肪凝石
乳兼味著霜橙未入宵來饌吟詩久不成

送王蒲衣采詩惠潮

樹樹熟離支殊非遠別時新蟬湘子廟初日海王祠路記雙江
合文猶八代衰時無采風使草野亦陳詩

王蒲衣見增江後集

送周德涵

便作天涯別重逢未可期快聞經世論兼讀過庭詩騏驥宜千
里鷦鷯且一枝野人頭已白不復問當時

周德涵名籍本末待考

贈別黃忍菴太史

百年無作者之子擅奇才豈謂黔中使翻從嶺上迴衡文時望
重握手老懷開更喜居停近深宵亦往來

東郭淹游跡南園接古祠乘車為客日閉戶著書時怯醉開柳
酒泛酸剝荔支海隅多異物嵇陸未能詩

學到難窮地文能不愧名雖為今太史猶似老諸生江海心常

下山林跡未并一時稱盛事千里聚同聲

時王阮亭官詹高謬
國廷評並以使事至

暫為鄉井別十日惜分携觀化俄生柳

予時病瘡

看書示杖藜心知

龍節返路出海雲西會買扁舟送漁家水滿隄

黃輿堅字廷表號忍菴太倉人順治進士康熙中召試
博學鴻詞授編修官贊善善畫工詩著有忍菴集錢牧
齋序其詩謂長安金陵雜感諸篇頗挫鉤鎖纏綿惻愴
在韓致堯元裕之之間吳梅村嘗選婁東十子詩以與
堅為冠十子者與堅周肇顧湄許旭王撰王攄王昊王
揆王抃王曜升也

按先生祭外弟湛克正文云吾既出獄而病瘡彌月
據先正事略 獨流堂文集

病中承彭子安見過別後奉懷

度嶺年殊少軒車滿路光病中吾見汝秋後客何鄉伏枕違清

論開篇得妙方愈風文檄在繼述有諸郎

時見惠尊人
躬菴文集

彭子安南昌人士望子本末待考

送林敬臣

南雁去不極北風聲正喧何堪衰草日還是送王孫再世依耕
鑿空山矢寤言與誰登冠石放眼望中原

林敬臣名籍本末待考

病足舟中即事

興劇思憑覽人扶上小舳客囊携薏苡鄉酒寄松毛少食肌時

減多眠骨屢高可憐中夜夢躍馬尚能豪

送溫茂長

三秋遠侍養萬里赴京華江路聞霜葉天門照雪花親存宜薄祿年少且辭家燕絕金臺上看君步玉驂

溫茂長名籍本末待考

送錢目天

度嶺三年客歸心四月天別離良未易鬚鬢况蒼然古筆追秦漢深杯得聖賢似君何不可高詠滿吳船

錢目天名籍本末待考

輓湯惕菴先生

大雅久云沒中原尚此人晨星方在望宿草已踰春便自成千載何由贖百身惟餘召公樹蔽芾粵江濱

湯來賀字佐平改字念平號惕菴南豐人明崇禎庚辰進士由郎署歷任廣東按察司僉事植性嚴厲雅有風裁以鯁直著聲每月親行州里講讀六箴勸勵風俗有勢豪子弟犯法按治不少徇蒞政未久嶺海肅清旋晉總制加兵部尚書不就歸明亡後為遺民四十餘年嘗道聘入廬山主鹿洞書院年八十二卒學者稱惕菴先生著有內省齋集

按裘君弘西江詩話稱惕菴先生理學大儒予以丁卯初夏晉謁臨別先生贈詩一章時年八十一云是來賀以翌歲康熙二十七年戊辰卒也宿草已踰春則先生殆於己巳始得來賀逝世之訊矣

據江西通志 廣東通志 裘君弘西江詩話

初春江行有感

人日吟詩坐客船白髭臨水一茫然西來山坼雲中峽北上江

明雪後天幾處小帘春市酒誰家新月夜鳴絃郊原頗記從軍
地草草東風又十年

過鍾莘野留贈

萬峰東走峽門青巖石蒼蒼見列星游子偶來停短棹故人高
卧有閒亭花明欄檻朝長倚月滿溪橋夜不扃四十年前文酒
會白頭相對記趨庭

鍾莘野本末待考以詩意觀之想是肇慶人也

寄周平山

介節清風最起予此心雖邇迹常疏青春蓮府銜杯罷明月茅
齋入夢初七國奇才多在客六朝名士總能書何因報我瑤華

句一紙寒山慰索居

周平山名籍本末待考

寄葉許山

荔枝曾自小園分
荔子紅時倍憶君
短髮細梳涼夜月
虛窗高掩後山雲
狂書往事追孤史
夢寄閒身到鶴羣
十載別來今大老
鱣湖觴酌更須勤

葉許山見增江後集

寄葉猶龍

門功先世在安邊
少執金吾漢帝前
寶帶尚存天府賜
篋書猶是異人傳
閒中歲月耽山水
亂後文章託管絃
長記黃塘好風

景近來添得幾湖船

葉猶龍佚其名惠州人祖夢熊明嘉靖乙丑進士歷官
 陝西甘肅巡撫兵工兩部尚書加太子太保明史有傳
 猶龍年十三以祖蔭官錦衣衛指揮同知旋以親老乞
 假歸明亡不復仕進築沁園於西湖與諸名流賦詩游
 宴其間先是武宗內府有琴名綠綺臺唐武德年製武
 宗以賜劉某鄭露得於劉家廣州再破靈抱琴死騎兵
 取之鬻於市猶龍見而歎曰噫嘻是御琴也解百金贖
 歸暇日招諸名流泛舟西湖命客彈之於是屈大均等
 皆流涕為賦長歌云猶龍有兄亦佚其名遭國變後亦
 築園惠陽不復出屈大均贈詩云江山戰後日蕭條壯
 士聞笳慘不驕兄弟登高猶九日君臣失路已三朝時
 以為俱抱德而隱者也
 按歸善縣志恩蔭表葉世仍注云以父夢熊蔭錦衣衛
 指揮同知又葉維城注云襲祖蔭陞堂上僉官管事都
 指揮同知復按惠州府志載康熙八年修西湖北隄葉
 君維陽捐貲過半葉君視公事如己事固抱德而隱者
 也云維城維陽似屬兄弟派名則維城疑即葉許山維
 陽疑即葉猶龍而世仍則其父也

據翁山詩外

惠州府志

廣東新語

粵東詩海

歸善縣志

梁顥若池中蓮開一花紅白各半索賦三首

半紅半白兩相加開向城西處士家何處更尋連理樹一枝全
勝並頭花朗如弦月猶銜魄清比江雲欲變霞知道先生真訣
得石牀相伴養丹砂

金行為白火為紅大冶原多煅煉功朱粉並施鄰女美色香齊
現法輪空高懷濯濯居人外巧笑盈盈立水中記得六朝王儉
府一江南北互相雄

豈曰卑棲意自殊亭亭泥滓不曾汙一莖擢出仙人掌三氣凝
為太極圖髮為丹心常早白玉緣泣血半成珠雌雄好是芙蓉

劍南斗光芒近有無

梁觀字顯若見增江後集

梁觀隱居順德邑城西山康熙甲子夏池蓮開花忽紅
白各半自夏徂秋所發皆然白雲紅霞清輝交映一時
傳為奇觀

據順德縣志

宋崱菴招飲南園即事賦別

客裏深勞命酒杯南園臘月正梅開城根倒影夕陽落橋下寒
聲潮水來千里賓朋萍跡合百年懷抱鬢毛催滄江白社吟詩
地送爾風流宋玉才

宋崱菴名籍本末待考

南園在廣州城南門外明初趙介孫蕢王佐李德黃哲
結社園內抗風軒是為南園前五子明嘉靖間歐元任
梁有譽黎民表吳旦李時行復結社於此是為南園後

五子所謂滄江白社吟詩地者也
據廣東通志

答張桐君

數月逡巡未報詩十年離索更何為雄心老去成灰燼白雪吟
多上鬢絲虞苑青蠅嗟往事陸生車馬記前時只應共擷東籬
菊買醉南園濁酒卮

張桐君見前

至日同溫茂長姪汝侯雨中入高峽

寒雨淫朝歇也無酒杯相命且狂呼長風直破西江浪短日多
行百里途峽勢益奇霜既落山容如赭草全枯年年此地猶為
客愧見峰頭石望夫

溫茂長陳汝侯名籍本末待考
按高峽山上有望夫石

祝張二尹文宿

郭邊潮水日潺潺官舍無如少尹閒一卷新詩是公事夕陽支
枕對西山

昌黎曾為記藍田君較藍田一倍賢鉅竹老槐俱不有
樹已千年

送周維念

西江秋水正湯湯暑氣初銷小閣涼歸客過逢初泊舫病身相
送不離牀關山別路無杯酒書札京華少報章臥寫新詩不成

字故人休訝懶嵇康

時以病不能報吳青壇朱竹垞諸公書

周維念名籍本末待考

朱竹垞見前

吳震方字青壇浙江石門人康熙進士官監察御史著有晚樹樓詩稿嶺南雜紀讀書正音朱子論定文鈔

據四庫提要

送葉淵發

家門七葉金貂盛之子由來是冷人一偈安心居士法半年餐
荔嶺南身秋江有酒鱸魚美碧落無雲雁路新不向津頭望歸
棹病來哀樂總傷神

葉淵發名籍本末待考

贈別劉肩菴

相逢未得數追陪見說曾泛絕國來鳳詔到時蠻女拜龍神祭
日海雲開班生自有飛揚志漢武惟求跡蹠才斯世界平須俊
傑看君非久滯蒿萊

劉肩菴名籍本末待考

獻祝大司馬制府吳公

清風此日滿南隅文武兼權是丈夫百粵諸侯趨使節八蠻君
長拜兵符腰橫牛斗星邊氣白得驪龍領下珠浙水自來多俊
傑幾回封爵屬通儒

海門曾報射長鯨身作東南萬里城彩筆不妨裁露布素絲隨
處建干旌令如山岳軍皆肅心在冰壺政自清幸託樂郊何以